

法蘊足論

才一

三百五十六
第一

50280



阿毗達磨法蘊足論卷第一

大唐三藏聖教序

太宗文皇帝製

蓋聞二儀有像顯覆載以含生四時無形潛
寒暑以化物是以窺天鑑地庸愚皆識其端
明陰洞陽賢哲罕窮其數然而天地苞乎陰
陽而易識者以其有像也陰陽處乎天地而
難窮者以其無形也故知像顯可徵雖愚不
惑形潛莫覩在智猶迷況乎佛道崇虛乘幽
控寂弘濟萬品典御十方舉威靈而無上抑
神力而無下大之則弥於宇宙細之則攝於
毫釐無滅無生歷千劫而不古若隱若顯運

弟

百福而長今妙道凝玄遵之莫知其際法流
湛寂挹之莫測其源故知蠢蠢凡愚區區庸
鄙投其旨趣能無疑惑者哉然則大教之興
基乎西土騰漢庭而皎夢照東域而流慈昔
者分形分跡之時言未馳而成化當常現常
之世民仰德而知遵及乎晦影歸真遷儀越
世金容掩色不鏡三千之光麗像開面空端
四八之相於是微言廣被拯含類於三途遺
訓遐宣導群生於十地然而真教難仰莫能
一其旨歸曲學易遵邪正於焉紛糾所以空
有之論或習俗而是非大小之乘乍公時而
隆替有玄奘法師者法門之領袖也幼懷貞

敏早悟三空之心長契神情先苞四忍之行
松風水月未足比其清華仙露明珠詎能方
其朗潤故以智通無累神測未形超六塵而
迥出隻千古而無對凝心內境悲正法之陵
遲拙慮玄門慨深文之訛謬思欲分條析理
廣彼前聞截偽續真開茲後學是以翹心淨

土往遊西域乘危遠邁杖策孤征積雪晨飛
途間失地驚砂夕起空外迷天萬里山川撥
煙霞而進影百重寒暑躡霜雨而前蹤誠重
勞輕求深願達周遊西宇十有七年窮歷道
邦詢求正教雙林八水味道餐風鹿苑鷲峯
瞻竒仰異承至言於先聖受真教於上賢探

蹟妙門精窮奧業一乘五律之道馳驟於心
田八藏三篋之文波濤於口海爰自所歷之
國揔將三藏要文凡六百五十七部譯布中
夏宣揚勝業引慈雲於西極注法雨於東垂
聖教缺而復全蒼生罪而還福濕火宅之乾
燄共拔迷途朗愛水之昏波同臻彼岸是知
惡因業墜善以緣昇昇墜之端惟人所託譬
夫桂生高嶺零露方得泫其華蓮出淥波飛
塵不能汚其葉非蓮性自潔而桂質本貞良
由所附者高則微物不能累所憑者淨則濁
類不能沾夫以卉木無知猶資善而成善况
乎人倫有識不緣慶而求慶方冀茲經流施

將日月而無窮斯福遐敷與乾坤而永大

皇帝述三藏聖教序記

在春宮日製

夫顯揚正教非智無以廣其文崇闡微言非
賢莫能定其旨蓋具如聖教者諸法之玄宗
衆經之軌躅也綜括宏遠奧旨遐深極空有
之精微體生滅之機要詞茂道曠尋之者不
究其源文顯義幽履之者莫測其際故知聖
慈所被業無善而不臻妙化所敷緣無惡而
不剪開法網之綱紀弘六度之正教拯群有
之塗炭啓三藏之秘扃是以名無翼而長飛
道無根而永固道名流慶歷遠古而鎮常赴
感應身經塵劫而不朽晨鍾夕梵交二者於

鷲峯慧日法流轉雙輪於鹿苑排空寶蓋接
翔雲而共飛莊野春林與天華而合彩伏惟
皇帝陛下上玄資福垂拱而治八荒德被黔
黎斂衽而朝萬國恩加朽骨石室歸貝葉之
文澤及昆蟲金匱流梵說之偈遂使阿耨達
水通神甸之八川耆闍崛山接嵩華之翠嶺
竊以法性凝寂靡歸心而不通智地玄奧感
懇誠而遂顯豈謂重昏之夜燭慧炬之光火
宅之朝降法雨之澤於是百川異流同會於
海萬區分義揔成乎實豈與湯武校其優劣
堯舜比其聖德者哉玄奘法師者夙懷聰令
立志夷簡神清齟齬之年體拔浮華之世凝

情定室匿迹幽巖。栖息三禪。巡遊十地。超六
塵之境。獨步迦維。會一乘之旨。隨機化物。以
中華之無質。尋印度之真文。遠涉恒河。終期
滿字。頻登雪嶺。更獲半珠。問道往還。十有十
載。備通釋典。利物爲心。以貞觀十九年二月
六日奉勅於弘福寺翻譯聖教要文。凡六
百五十七部。引大海之法流。洒塵勞而不竭。
傳智燈之長燄。皎幽闇而恒明。自非久植勝
緣。何以顯揚斯旨。所謂法相常住。齊三光之
明。我皇福臻。同二儀之固伏。見御製衆
經論序。照古騰今。理含金石之聲。文抱風雲
之潤。治輒以輕塵足。岳墜露添流。略舉大綱。

以爲斯記

阿毗達磨法蘊足論卷第一

尊者大目軋連造

三藏法師

玄奘奉詔譯

學處品第一

稽首佛法僧

真淨無價寶

今集衆法蘊

普施諸群生

阿毗達磨如大海

大山大地太虛空

具攝無邊聖法財

今我正勤略顯示

嗚柁南曰

學支淨果行聖種

正勝足念諦靜慮

無量無色定覺支

雜根處蘊界緣起

一時薄伽梵在室羅筏住逝多林給孤獨園

介時世尊告苾芻衆諸有於彼五怖罪怨不
寂靜者彼於現世爲諸聖賢同所訶厭名爲
犯戒自損傷者有罪有貶生多非福身壞命
終墮險惡趣生地獄中何等爲五謂殺生者
殺生緣故生怖罪怨不離殺生是名第一不
與取者劫盜緣故生怖罪怨不離劫盜是名
第二欲邪行者邪行緣故生怖罪怨不離邪
行是名第三虛誑語者虛誑緣故生怖罪怨
不離虛誑是名第四飲味諸酒放逸處者飲
味諸酒放逸處緣故生怖罪怨不離飲酒諸
放逸處是名第五有於如是五怖罪怨不寂
靜者彼於現世爲諸聖賢同所訶厭名爲犯

戒自損傷者有罪有貶生多非福身壞命終
墮嶮惡趣生地獄中

諸有於彼五怖罪怨能寂靜者彼於現世爲
諸聖賢同所欽歎名爲持戒自防護者無罪
無貶生多勝福身壞命終昇安善趣生於天
中何等爲五謂離殺生者離殺生緣故滅怖
罪怨能離殺生是名第一離不與取者離劫
盜緣故滅怖罪怨能離劫盜是名第二離欲
邪行者離邪行緣故滅怖罪怨能離邪行是
名第三離虛誑語者離虛誑緣故滅怖罪怨
能離虛誑是名第四離飲諸酒放逸處者離
飲諸酒放逸處緣故滅怖罪怨能離飲酒諸

放逸處是名第五有於如是五怖罪怨能寂
靜者彼於現世為諸聖賢同所欽歎名為持
戒自防護者無罪無貶生多勝福身壞命終
昇安善趣生於天中亦時世尊為攝前義而
說頌曰

諸行殺盜姪

虛誑耽諸酒

五怖罪怨縛

聖賢所訶厭

名犯戒自傷

有罪招非福

死墮嶮惡趣

生諸地獄中

諸離殺盜姪

虛誑耽諸酒

五怖罪怨脫

聖賢所欽歎

名持戒自守

無罪感勝福

死昇安善趣

生諸天界中

齊何名曰鄔波索迦謂諸在家白衣男子男

根成就歸佛法僧起殷淨心發誠諦語自稱
我是鄔波索迦願尊憶持慈悲護念齊是名
曰鄔波索迦此何名為能學一分謂前所說
鄔波索迦歸佛法僧發誠言已惟能離殺不
離餘四如是名為能學一分復何名為能學
少分謂如前說鄔波索迦歸佛法僧發誠言
已能離殺盜不離餘三如是名為能學少分
復何名為能學多分謂前所說鄔波索迦歸
佛法僧發誠言已離殺盜姪不離餘二如是
名為能學多分復何名為能學滿分謂前所
說鄔波索迦歸佛法僧發誠言已具能離五
如是名為能學滿分

成就五法。邬波索迦，惟能自利，不能利他。何等爲五？謂前所說邬波索迦，自離殺生，乃至飲酒，諸放逸處，不能勸他，令離殺生，乃至飲酒，諸放逸處，如是名爲成就五法。邬波索迦，惟能自利，不能利他，成就十法。邬波索迦，能利自他，不能廣利，何等爲十？謂前所說邬波索迦，自離殺生，乃至飲酒，諸放逸處，亦能勸他，令離殺生，乃至飲酒，諸放逸處，不能見餘能離殺等歡喜慶慰，如是名爲成就十法。邬波索迦，能利自他，不能廣利，成就十五法。邬波索迦，能利自他，亦能廣利，何等十五？謂前所說邬波索迦，自離殺生，乃至飲酒，諸放逸

處亦能勸他令離殺生乃至飲酒諸放逸處
及能見餘離殺生等歡喜慶慰如是名爲成
就十五法邬波索迦能利自他亦能廣利成
就八法邬波索迦惟能自利不能利他何等
爲八謂前所說邬波索迦自具淨信不能勸
他令具淨信自具淨戒不能勸他令具淨戒
自具惠捨不能勸他令具惠捨自能策勵數
往伽藍禮覲有德諸苾芻衆不能勸他令其
策勵數往伽藍禮覲有德諸苾芻衆自能至
誠聽聞正法不能勸他令其至誠聽聞正法
自聞法已能持不忘不能勸他令持不忘自
持法已能思擇義不能勸他令思擇義自思

擇已爲證法義能正勤修法隨法行成和敬
行隨法行者不能勸他令正勤修法隨法行
成和敬行隨法行者如是名爲成就八法鄔
波索迦惟能自利不能利他成就十六法鄔
波索迦能利自他不能廣利何等十六謂前
所說鄔波索迦自具淨信亦能勸他令具淨
信廣說乃至自思擇已爲證法義能正勤修
法隨法行成和敬行隨法行者亦能勸他令
正勤修法隨法行成和敬行隨法行者不能
見餘具淨信等歡喜慶慰如是名爲成就十
六法鄔波索迦能利自他不能廣利成就二
十四法鄔波索迦能利自他亦能廣利何等

名爲二十四法謂前所說鄔波索迦自具淨
信亦能勸他令具淨信廣說乃至自思擇已
爲證法義能正勤修法隨法行成和敬行隨
法行者亦能勸他令正勤修法隨法行成和
敬行隨法行者及能見餘具淨信等歡喜慶
慰如是名爲成就二十四法鄔波索迦能利
自他亦能廣利
成就十法身壞命終墮險惡趣生地獄中何
等爲十一殺生二不與取三欲邪行四虛誑
語五離間語六麁惡語七雜穢語八貪欲九
瞋恚十邪見若有成就如是十法身壞命終
墮險惡趣生地獄中

成就十法身壞命終昇安善趣生於天中何等爲十一離殺生二離不與取三離欲邪行四離虛誑語五離離間語六離麤惡語七離雜穢語八無貪九無瞋十正見若有成就如是十法身壞命終昇安善趣生於天中成就二十法身壞命終墮嶮惡趣生地獄中何等二十謂自殺生亦勸他殺廣說乃至自起邪見亦復勸他令起邪見若有成就此二十法身壞命終墮諸惡趣生地獄中成就二十法身壞命終昇安善趣生於天中何等二十謂自離殺亦能勸他令其離殺廣說乃至自起正見亦能勸他令起正見若有

成就此二十法身壞命終昇安善趣生於天中
成就三十法身壞命終墮嶮惡趣生地獄中
何等三十謂自不離殺勸他令殺見不離殺
歡喜慰喻廣說乃至自起邪見亦復勸他令
起邪見見起邪見歡喜慰喻若有成就此三
十法身壞命終墮嶮惡趣生地獄中

成就三十法身壞命終昇安善趣生於天中
何等三十謂自離殺生勸他離殺見餘離殺
歡喜慰喻廣說乃至自起正見亦復勸他令
起正見見起正見歡喜慰喻若有成就此三
十法身壞命終昇安善趣生於天中
成就四十法身壞命終墮嶮惡趣生地獄中

何等四十謂自不離殺勸他今殺見不離殺
歡喜慰喻稱揚讚歎殺生者事廣說乃至自
起邪見亦復勸他今起邪見見起邪見歡喜
慰喻稱揚讚歎邪見者事若有成就此四十
法身壞命終墮險惡趣生地獄中
成就四十法身壞命終昇安善趣生於天中
何等四十謂自離殺生勸他離殺見餘離殺
歡喜慰喻稱揚讚歎離殺者事廣說乃至自
起正見亦復勸他今起正見見起正見歡喜
慰喻稱揚讚歎正見者事若有成就此四十
法身壞命終昇安善趣生於天中
鄒波索迦有五學處何等爲五乃至命終遠

離殺生是名第一乃至命終離不與取是名
第二乃至命終離欲邪行是名第三乃至命
終離虛誑語是名第四乃至命終離飲諸酒
諸放逸處是名第五於第一中且何名爲能
殺生者如世尊說有殺生者暴惡血手耽著
殺害於諸有情衆生勝類無著無愍下至摺
多比畢洛迦皆不離殺如是名爲能殺生者
何等名爲有殺生者謂於殺生不深厭患不
遠不離安任成就如是名爲有殺生者何名
暴惡謂集種種弓刀杖等諸殺害具是名暴
惡何名血手謂諸屠羊屠雞屠猪捕鳥捕魚
獵師劫盜魁膾縛龍守獄煮狗施置槌等是

名血手何故此等名爲血手謂彼雖數沐浴
塗香服鮮淨衣首冠華鬘身飾嚴具而名血
手所以者何彼於惡事不深厭患不遠不離
今有情血起等起生等生積集流出故名血
手何等名爲耽著殺害謂於衆生有害非殺
有害亦殺害非殺者謂以種種弓刀杖等諸
殺害具逼惱衆生未全斷命如是名爲有害
非殺害亦殺者謂以種種弓刀杖等諸殺害
具逼惱衆生亦全斷命如是名爲有害亦殺
於殺害事耽樂執著如是名爲耽著殺害何
等名爲於諸有情衆生勝類無著無愍且辯
衆生勝類差別謂諸異生說名衆生世尊弟

子說名勝類又諸有情有貪瞋癡說名衆生
若諸有情離貪瞋癡說名勝類又諸有情有
愛有取說名衆生若諸有情離愛離取說名
勝類又諸有情有順無違說名衆生若諸有
情無順有違說名勝類又諸有情無聰慧有
無明說名衆生若諸有情聰慧有明說名勝
類又諸有情未離欲貪說名衆生若諸有情
已離欲貪說名勝類又諸有情未離欲貪非
佛弟子說名衆生若諸有情已離欲貪是佛
弟子說名勝類今此義中若諸異生說名衆
生世尊弟子說名勝類所以者何勝謂涅槃
彼能獲得成就獨證故名勝類如有頌言

普隨順世間

周徧歷方邑

欲求於勝我

無所證無依

故此義中若諸異生說名衆生世尊弟子說名勝類於此有情衆生勝類應著應愍而於其中無慙無著無愧無耻無哀無愍無傷無念如是名爲於諸有情衆生勝類無著無慙何等名爲下至拮多比界洛迦皆不離殺言拮多者謂蚊蚋等諸小蟲類比界洛迦即諸蟻子下至此類微碎衆生皆起惡心欲興殺害是故名爲能殺生者即於此中何名爲生何名殺生何等名爲遠離殺生而說名爲乃至命終遠離殺生鄔波索迦第一學處所言

生者謂諸衆生有衆生想若諸有情有有情
想若諸命者有命者想若諸養育有養育想
若補特伽羅有補特伽羅想是名爲生言殺
生者謂於衆生起衆生想於諸有情起有情
想於諸命者起命者想於諸養育起養育想
於補特伽羅起補特伽羅想復起惡心不善
心損心害心殺心現前依如是業如是加行
如是思惟如是策勵如是勇猛殺害衆生故
思斷命由如是業如是加行如是思惟如是
策勵如是勇猛殺害衆生故思斷命名爲殺
生即前所說鄔波索迦於此殺生能善思擇
厭患遠離止息防護不作不爲不行不犯棄

捨堰塞不拒不逆不違不越如是名爲遠離
殺生是故說名乃至命終遠離殺生鄔波索
迦第一學處

於第二中且何名爲不與取者如世尊說有
不與取者或城邑中或阿練若不與物數劫
盜心取不離劫盜如是名爲不與取者何等
名爲有不與取者謂於不與取不深厭患不
遠不離安住成就如是名爲有不與取者何
等名爲或城邑中謂有城墻周帀圍繞何等
名爲或阿練若謂無城墻周帀圍繞何名不
與謂他攝受不捨不棄不惠不施何等名物
謂他攝受有情無情諸資生具即此名爲不

與物數何等名爲劫盜心取不離劫盜謂即
所說不與物數懷賊心取不厭遠離如是名
爲不與物數劫盜心取不離劫盜是故名爲
不與取者即於此中何名不與何名不與取
何名離不與取而說名爲乃至命終離不與
取鄔波索迦第二學處言不與者謂他攝受
有情無情諸資生具不捨不棄不惠不施是
名不與不與取者謂於他攝受諸資生具起
他攝受及不與想復起惡心不善心劫心盜
心執心著心取心現前依如是業如是加行
如是思惟如是策勵如是勇猛如是門如是
路於他攝受諸資生具以執著取劫盜故思

舉離本處由如是業如是加行如是思惟如
是策勵如是勇猛如是門如是路於他攝受
諸資生具以執著取劫盜故思舉離本處名
不與取即前所說鄔波索迦於不與取能善
思擇厭患遠離止息防護不作不為不行不
犯棄捨堰塞不拒不逆不違不越如是名為
離不與取是故說名乃至命終離不與取鄔
波索迦第二學處

於第三中且何名為欲邪行者如世尊說有
欲邪行者於他女婦他所攝受謂彼父母兄
弟姊妹舅姑親眷宗族守護有罰有障有障
罰俱下至投擲華鬘等信於是等類起欲煩

惱招誘強抑共為邪行不離邪行如是名為
欲邪行者何等名為有欲邪行者謂於欲邪
行不深厭患不遠不離安住成就如是名為
有欲邪行者他女婦者謂七種婦何等為七
一授水婦二財貨婦三軍掠婦四意樂婦五
衣食婦六同活婦七須臾婦授水婦者謂女
父母授水與男以女妻之為彼家主名授水
婦財貨婦者謂諸丈夫以少多財賀易他女
將為己婦名財貨婦軍掠婦者謂有丈夫因
伐他國抄掠他女將為己婦復有國王因破
敵國取所欲已餘皆捨棄有諸丈夫力攝他
女將為己婦如是等類名軍掠婦意樂婦者

謂有女人於男子家自信愛樂願住爲婦名
意樂婦衣食婦者謂有女人於男子家爲衣
食故願住爲婦名衣食婦同活婦者謂有女
人詣男子家謂男子曰我持此身願相付託
彼此所有共爲無二互相存濟以盡餘年冀
有子孫歿後承祭名同活婦須臾婦者謂有
女人樂與男子暫時爲婦名須臾婦他攝受
中母守護者謂有女人其父或狂或復心亂
或憂苦逼或已出家或遠逃逝或復命終其
母孤養防守遮護私誠女言諸有所作必先
白我然可得爲名母守護父守護者謂有女
人其母或狂或復心亂廣說乃至或復命終

其父孤養防守遮護私誠如前名父守護兄弟守護者謂有女人父母或狂或復心亂廣說乃至或復命終兄弟孤養防守遮護私勸誠言諸有所作必先告白然可得為名兄弟守護姊妹守護者謂有女人父母或狂或復心亂廣說乃至或復命終姊妹孤養防守遮護勸誠如前名姊妹守護舅姑守護者謂有女人其夫或狂或復心亂廣說乃至或復命終依舅姑居舅姑喻曰介勿愁惱宜以自安衣食之資悉以相給我當憂念如子不殊舅姑恩恤防守遮護私誠之言諸有所作必先諮白然可得為名舅姑守護親眷守護者謂

有女人除母及夫餘異姓親名為親眷而此
女人為彼親眷防守遮護名親眷守護宗族
守護者謂有女人除父兄等餘同姓親名為
宗族而此女人為彼宗族防守遮護名宗族
守護言有罰者謂有女人自無眷屬又非姪
女若有凌逼為王所知或殺或縛或復駟擯
或奪資財名為有罰言有障者謂有女人身
居卑賤雖無親族而有主礙名為有障有障
罰俱者謂有女人自無眷屬又非卑賤依恃
他居為他所礙若有凌逼所依恃者便為加
罰名障罰俱又上所說一切女人隨所依止
皆有障罰所以者何由諸女人法有拘礙非

禮行者便遭殺縛或奪資財或被退毀是故
一切名障罰俱何等名為下至投擲華鬘等
信謂有女人已受男子或華或鬘或諸瓔珞
或塗香末香或隨一信物如是名為下至投
擲華鬘等信何等名為於是等類謂諸男子
諸半擇迦諸修梵行何等名為修梵行者謂
諸苾芻尼正學勤策女及鄔波斯迦出家外
道女下至在家修苦行女謂有男子捨自妻
媵告言善賢放汝自在修諸梵行彼聞受持
苦行無怠何等名為起欲煩惱廣說乃至不
離邪行謂起欲界婬貪現前於不應行招誘
強抑共為邪行不厭遠離如是名為起欲煩

惱廣說乃至不離邪行是故名爲欲邪行者
即於此中何等名欲何名欲邪行何名離欲
邪行而說名爲乃至命終離欲邪行鄔波索
迦第三學處所言欲者謂是婬貪或所貪境
欲邪行者謂於上說所不應行而暫交會下
至自妻非分非禮及非時處皆名欲邪行即
前所說鄔波索迦於欲邪行能善思擇厭患
遠離止息防護不作不爲不行不犯棄捨堰
塞不拒不逆不違不越如是名爲離欲邪行
是故說名乃至命終離欲邪行鄔波索迦第
三學處

於第四中且何名爲虛誑語者如世尊說有

虛誑語者或對平正或對大衆或對主家或對執理或對親族同檢問言咄哉男子汝知當說不知勿說汝見當說不見勿說彼得問已不知言知知言不知見言不見不見言見彼或爲己或復爲他或爲名利故以正知說虛誑語不離虛誑如是名爲虛誑語者何等名爲有虛誑語者謂於虛誑語不深厭患不遠不離安住成就如是名爲有虛誑語者何等名爲或對平正平正有三一村平正二城平正三國平正此諸平正聚集現前同檢問時名對平正何等名爲或對大衆大衆有四一刹帝利衆二婆羅門衆三居士衆四沙門

衆此諸大衆聚集現前同檢問時名對大衆
何等名爲或對王家謂諸國王及餘宰輔理
公務者彼若聚集現前檢問名對王家何等
名爲或對執理謂閑法律固正斷者此執理
衆聚集現前同檢問時名對執理何等名爲
或對親族謂諸親族聚集現前同檢問時名
對親族何等名爲同檢問等謂或爲證或究
其身衆集量宜同檢問曰咄哉男子今對衆
前應以誠言具疑情實若於是事見聞覺知
宜當宣說施設標示若於是事無見聞等勿
當宣說施設標示如是名爲同檢問等何等
名爲不知言知謂爲耳識曾受曾了名爲已

聞彼無耳識曾受曾了隱蔽如是想忍見樂
言我已聞如是名為不知言知何等名為知
言不知謂為耳識曾受曾了名為已聞彼有
耳識曾受曾了隱蔽如是想忍見樂言我不
聞如是名為知言不知何等名為不見言見
謂為眼識曾受曾了名為已見彼無眼識曾
受曾了隱蔽如是想忍見樂言我已見如是
名為不見言見何等名為見言不見謂為眼
識曾受曾了名為已見彼有眼識曾受曾了
隱蔽如是想忍見樂言我不見如是名為見
言不見何等名為彼或為已謂有一類身行
劫盜王等執問汝為賊不彼得問已竊自思

惟若實荅者必爲王等或殺或縛或復駈擯
或奪資財我今宜應自隱自覆自蔽實事故
以正知說虛誑語旣思惟已荅王等言我實
不爲不與取事是名爲己何等名爲或復爲
他謂有一類親族知友行於劫盜王等爲證
執問彼言汝知此人行劫盜不彼得問已竊
自思惟若實荅者我諸親友必爲王等或殺
或縛或復駈擯或奪資財我今宜應隱覆蔽
彼故以正知說虛誑語旣思惟已荅王等言
我知親友決定不爲不與取事是名爲他何
等名爲或爲名利謂有一類多有所欲多有
所思多有所願作是思惟我當施設如是如

是虛誑方便必當獲得可意色聲香味觸等
既思惟已方便追求故以正知說虛誑語如
是名爲或爲名利何等名爲故以正知說虛
誑語謂自隱藏想忍見樂故思明了數數宣
說施設標示違想等事如是名爲故以正知
說虛誑語即於此中何名虛誑何名虛誑語
何名離虛誑語而說名爲乃至命終離虛誑
語卽波索迦第四學處言虛誑者謂事不實
名虛想等不實名誑是名虛誑虛誑語者以
貪瞋癡違事想說令他領解名虛誑語即前
所說卽波索迦於虛誑語能善思擇厭患遠
離止息防護不作不爲不行不犯棄捨堰塞

不拒不逆不違不越如是名為離虛誑語是
故說名乃至命終離虛誑語邬波索迦第四
學處

於第五中何名諸酒何名飲諸酒何名放逸
處何名離飲諸酒諸放逸處而說名為乃至
命終離飲諸酒諸放逸處邬波索迦第五學
處言諸酒者謂宰羅酒迷麗耶酒及末陁酒
言宰羅者謂米麥等如法蒸煮和麴藥汁投
諸藥物醞釀具成酒色香味飲已昏醉名宰
羅酒迷麗邪者謂諸根莖葉華果汁不和麴
藥醞釀具成酒色香味飲已昏醉名迷麗邪
酒言末陁者謂菰桃酒或即宰羅迷麗邪酒

飲已令醉揔名未陞飲諸酒者謂飲咽嚙如上諸酒名飲諸酒放逸處者謂上諸酒飲已能令心生憍傲昏醉狂亂不識尊卑重惑惡業皆因此起放逸所依名放逸處即前所說鄔波索迦於飲諸酒能善思擇厭患遠離止息防護不作不爲不行不犯棄捨堰塞不拒不逆不違不越如是名爲離飲諸酒諸放逸處是故說名乃至命終離飲諸酒諸放逸處鄔波索迦第五學處

如是五種云何名學云何名處言學處耶所言學者謂於五處未滿爲滿恒勤堅正修習加行故名爲學所言處者即離殺等是學所

依故名爲處又離殺等即名爲學亦即名處
故名學處

一切鄔波索迦皆歸佛法僧耶除諸世俗鄔
波索迦一切皆歸佛法僧寶有歸佛法僧寶
而非鄔波索迦謂苾芻苾芻尼正學勤策勤
策女鄔波斯迦等

一切鄔波索迦皆世尊弟子耶應作四句有
鄔波索迦非世尊弟子謂鄔波索迦未得見
諦於未來果未能現觀有世尊弟子非鄔波
索迦謂苾芻苾芻尼正學勤策勤策女鄔波
斯迦等已得見諦於未來果已能現觀有鄔
波索迦亦世尊弟子謂鄔波索迦已得見諦

於未來果已能現觀有非鄔波索迦非世尊
弟子謂苾芻苾芻尼正學勤策勤策女鄔波
斯迦未得見諦於未來果未能現觀及餘異
生未見諦者

一切墮僧寶攝皆得僧和敬耶應作四句有
墮僧寶攝非得僧和敬謂正學勤策勤策女
鄔波索迦等已得見諦於未來果已能現觀
有得僧和敬非墮僧寶攝謂苾芻苾芻尼未
得見諦於未來果未能現觀有墮僧寶攝亦
得僧和敬謂苾芻苾芻尼已得見諦於未來
果已能現觀有非墮僧寶攝非得僧和敬謂
正學勤策勤策女鄔波索迦鄔波斯迦未得

